



DEO OPTIMO MAX.

UNI ET TRINO,

VIRGINI DEI. PARÆ ET S. LUCÆ,

Orthodoxorum Medicorum Patrono.

BIU Santé
Médecine
Paris

QUÆSTIO MEDICA

CARDINALITIIS DISPUTATIONIBUS

*manè discutienda in Scholis Medicorum, die mercurii decimâ quartâ
mensis Septembris, anno Domini M. DCC. LXXXV.*

M. JOANNE D'ARCET, Chemiæ Professore regio, è regiâ Scien-
tiarum Academiâ Parisiensi, nec non Academiæ Regalis Medi-
cinæ Matritensis Socio, Doctore Medico, præside.

Utrum aquæ ligeris haustus, morbis, apud aurelianos præcaveat?

I

ARGENTEUM illud limpidumque fluidum, orbi universo coævum & com-
mune, ponderosum, incompressibile, elasticum, permeabile, expan-
sivum in vapores solubile, nullis colore, odore, sapore, si purum sit, præ-
ditum, in genere dicitur aqua; quæ sub duplici respectu potest considerari. Si
hanc ut elementum spectes, seu principium constitutivum mixtorum & compo-
si-

A

torum tum naturalium tum artificialium, quodque ab eorum analysi absolutâ producitur, ubique reperienda est; ac in omnium ferè corporum decompositione plus minusve apparet. Si verò ad ejus existentiam peculiarem & distinctam attendas, substantia erit elementaris, simplex, pura, improductibilis, & incommutabilis. Liquiditas aquæ essentialis esse non videtur; dum, è contrâ, soliditatem statum ejus naturalem constituere probabile est. Prior etenim qualitas est effectus motus, ab igne universis & singulis aquæ particulis communicati, quo cessante aut sensim imminuto, ad consistentiam solidam vergit aqua & in glaciem convertitur. Glacies ergo ad aquam se habet liquidam veluti metallum refrigeratum & solidum respectu metalli in fusionem missi. Aquæ fluiditatem per partium configurationem explicare incassum tentares; cimneriis adhuc hæc latet tenebris. Quælibet itaque figura modo extrema adsit divisio, fluiditatis offert phœnomena, quæ in intestino jugique molecularum aquæarum motu consistit. Incompressibilem esse aquam, jamdudum, nulli ignota Academia del cimento experimenta demonstrarunt; indè partium ejus maxima rigiditas exilitatque summa exurgit. Innumeras habet proprietates tum in universâ rerum naturâ, tum in peculiari hominis œconomia perutiles & valdè necessarias. Variis vario modo corporibus immiscetur, eorum poros penetrat, eaque madefacit, humiditatis seu vaporisationis ope, è molecularum constituentium novâ cum materiâ caloris combinatione dependentis. Ipsarummet vis cohæsionis admodum debilis efficit ut nixus ad unionem, cui universa subjicitur materia, totam energiam in aquam exerat. Illa itaque ferè cunctis corporibus facillè unitur ea que dissolvit; undè *magnum dissolvens*, vulgò nuncupatur. Salia ergò omnia solvit aqua tum & succos gummosos & extractivos vegetantium, saponos quoque, necnon & omnes substantias animantium lymphaticas & gelatinosas. Partes etiam quasdam plerarumque terrarum secum trahit eas etsi non omnino dissolvat, quarum deindè fit præcipitatio per evaporationem. At in dissolutionis operatione determinatam tantum corporum solubilitatem illa dissolvit, neque ultrâ terminum in arte chemicâ sub nomine, *puncti saturationis* cognitum, prætergreditur. Ignem corporibus combustibilibus admotum extinguit, communicationem scilicet cum aëre ad combustionem absolutè necessario, præpediendo. Hoc ultimum principium nihilominus suas intra moleculas disseminatum continet, verum omni elasticitate orbatur & ad statum solutionis, ut ita dicam, redactum. Dilatationis rarefactionisque per actionem ignis continuatam capax est aqua, ad ebullitionem usque, versus octogesium vel octogesium quartum thermometri realmuriani gradum, quem cum attingit, maximo relativo calore prædita, tunc capacitatem ordinario volumine viginti sex ampliorem acquirit. Si verò in illo statu coërceatur & evaporationem subire nequeat, ut in machinâ papinianâ, plumbum, stannumve liquida reddere valet. Uno verbo inter principia corporum constituenta præcipuum obtinet locum, quibus vim activam & energiam conciliat, eaque, si ita loqui fas sit, fœcundat, vel intimâ suâ combinatione vel miscelâ tantumlibet. Motum ab igne corporibus communicatum adauget, aërem spirabilem reddit, terram quasi fovet & enutrit.

I I.

A primis mundi incunabulis, cunctorum potus animantium aquosus latex est. Hujus salubritatem expertos fuisse protoparentes nostros turmatim, tum sacri, tum profani scriptores testantur. Tutius jam hodiè, licet infrequentiùs usurpatur blandus hic liquor. Ingestorum etenim divisionem fovet, subactamque alibilem massam diluit. Vel exilissima corporis vasa permeando, omnibus colatoriis discernendum transmittit liquorem. Excretionum secretionumque materiam è san-

guinis flumine separat. Purpureum ipsummet fluidum multifariosque ex ipso scaturientes succos à coalitu & densatione, unà cum motu partium perenni, vindicat Salia intrà corpus hærentia dissolvit. Partium solidarum tensionem nimiam rigoremque nocivum aufert; mollitiem his naturalem præbet: tandemque sanitati conservandæ ac reparandæ præ cæteris par est. Sed non omnes aquæ prædictos producunt effectus. Puram eligas, illimem, pellucidam, levem, inodoram, non acrem, non falsam, palato gratam, quæ faciliè calefcat, frigeſcat, quæque coquendis aptissima leguminibus, pani ritè conficiendo nata, saponi dissolvendo parata, principiis heterogeneis careat. Sed quis neget his dotibus eminere aquas fluviales, eò præstantiores & aliis eò certius auteponendæ, quo motu suo plus dividuntur, exindè que aëre puro saturatæ, agitatione vividâ & perenni volutatione celerius renovantur.

I I I.

TALE est Aurelianorum altor, ligeris flumen, quod secundo additæ commercio urbi allabitur; eamque ditat & exornat. E vivo fonte manans, è sublimiorique erumpens monte, hoc jam salutat sol matutinus. Cursu sat rapido defluens, alveo gaudet ex arenâ tenui, crassisve filicibus pellucidis & albis, ut plurimum, efformato. Succi plenos & gratè sapidos pisces inſi nu accipit, paucisque refertur plantis. Limpidæ admodum ligeris aquæ, dulces sunt & leves omninò: ferè nullis donantur principiis heterogeneis, quod comprobatum est experimentis & observationibus. Dum miscentur etenim cum syrupo violarum, violaceum ejus sensim non alterant colorem. Limpiditatem integram servant, nec ulla sit præcipitatio post affusionem tum solutionum argenti & mercurii per acidum nitrosum, tum etiam alkali caustici effervescentis. Si verò analysi Chimiçæ per ignem subjiciantur sequentia offerunt phenomèna. Viginti quinque aquæ ligeris libræ percolatæ fuerunt & evaporationi submissæ, ita ut quatuor unciz solum modo remanserint. Turbidus erat liquor & nonnullas terreas moleculas deponere visus est. Percolato deindè liquore & exsiccato colatorio, octo grana terræ calcaris ex albo flavescentis reperta fuere. Nonne exindè tenuissimos quosdam ferri atomos ibi latentes suspicari fas est! Maximè flavescentis erat percolatus, liquor qui denuò novæ evaporationi in capsulâ vitreâ expositus fuit. Quâ verò minuebatur proportionè, parva videbatur crusta salina unctuosa, capsulæ parietibus adhærescens & ad liquoris superficiem levem efformans pelliculam. Ad duas drachmas reductus liquor, subfuscum induit colorem & parumper nebulosum. In loco frigido depositus postea fuit, ut cristallisationi daretur occasio. Sed frustrâ! Quinimò liquoris volumen augmentum suscepit, eâ scilicet ratione quod materies salina parietibus capsulæ internis applicata, humiditatem aëris attraxisset & liquefacta fuisset. Porro natura salinæ hujusce substantiæ deliquescentis, illam integrè desiccare coëgit; tuncque viginti quatuor granorum pondus æquabat. In duobus postea aquæ stillatiæ unciis soluta fuit & percolata; cujus solutionis, viginti guttis, in tcypho, ubi jam aderat aqua stillatiæ, infusus, superadditæque, nitri mercurialis solutione, ex tempore præcipitatum album & caseosæ substantiæ formam emulans produci visum est; quod pariter locum habuit post affusionem nitri lunaris. Terram albam præcipitavit alkali fixum. Aqua verò calcis, post mixtionem guttarum aliquot salinæ suprà dictæ solutionis, non turbata fuit, quod evidenter probat salis hujus basim ejusdem esse naturæ ac calcem ipsam. Verum nonnullæ acidi vitriolici guttæ, hanc suprà solutionem alkalina pariter effusæ, non parvam selenitæ quantitatem præcipitaverunt, cum albis vaporibus, quæ vehementem croci odorem referebant. Ex his ergò experimentis concludere licet ligeris aquas continere sal neutrum ab unionè acidi marini cum terrâ calcari efformatum, paululumque calcis, gaz acido cretaceo, vulgò *air fixe* dicto saturatæ, quæ qui-

4

dem his in aquis soluta remanet, levis portionis prædicti gaz acidi excedentis ope. Sed hæc est prædictarum, in aquæ ligeris librâ, substantiarum proportio. Unaquaque scilicet, granum circiter salis marini cum basi calcari, tertiamque grani partem terræ calcaris continet. Ex his porro salinis principiis, fractâ sed iustâ dosi, solutis, aquarum ligeris benefica vis augetur & crescit.

IV.

VERUM enim verò illas, in statu naturali, ventriculo leves, intestinis amicas comminuendis alimentis extrahendis que eorum alibilibus succis accommodatissimas reperiēs: undè & ventris laxitatem benè ordinatam provocari & viscerum infarctibus præcaveri necessum est. Capiti ut pectori & nervis blandè favens ligeris aqua, prægnantium præsertim & Lactantium ydiosyncrasi convenit. Decantatas hujus dotes experiri cæteris aureliæ urbis incolis facilè & utilissimum. Quomagis salubrem adhibebunt potum, eò vegetiores fieri in dies sentient. Hominem ligeris aquarum potatorem egregium conspicias; roseus illi color, acies oculorum vivida, os floridum, halitus suavis, albi dentes, vegetiora membra, flexilis & lævigata cutis est. Sanitatis conservatrix hæc aqua, æconomiam animalem non solum tuetur sed & ipsos valet pellere morbos. Appetentiam perditam excitat, depravatas restituit digestionēs, febrem ipsam compescit, ferrosam convehit colluviem per renes & diaphoresim, calculi genesim prævertit, arcet que podagram. Sed quid plura? Cunctas, à fibrarum rigiditate & spissitudine fluidorum ægritudines ortas, sanat aut illis præcavet.

V.

QUEM sincerum fundit ligeris laticem pleno haustu ebibere avidos concives immeritò crederes! Ex præjudicatâ opinione illorum animis insculptâ, puteales aquas infumere non cessant. Quid mirum ergò, si non alibi frequentius quàm apud Aurelianos distorti corporis ingruunt nævi; si mulieres non paucæ, succi plenæ licet, tumentibus protuberant alvis, gibberæ sæpius; si calculosis viri infestantur concretionibus, herniis tentantur juvenes; si contumaces adeò diarrhæa, rhumatismi, arthritides; si obstructions & scorbutus omnis sexus, ætatis, conditionis, cives miserè excruciant. Invitè dicam, acerrimis vidi aurelianos laceffitosis morbis, quorum producendorum, solas accusandas puteales aquas esse, nunquam dubitavi. Chronicas in longum diem infeminant affectiones, pestiferoque potù clàm & impunè trucidant. Tot tantis que malis non tutior esset medela quam ligeris aqua, non præstantius pharmacum. Meritò itaque concludimus,

Ergò ligeris aquæ haustus, morbis, apud Aurelianos præcavet.

Proponebat Parisiis CAROLUS NICOLAUS BEAUVAIS DE PREAU, Aurelius, Doctor Medicus Bituricensis, Aurelianorum Medicorum Collegio Aggregatus, ejusdem urbis è Regiâ Rei Agrariæ Societate, Regiæque Phisices, Historiæ Naturalis & Artium Societatis olim Secretarius perpetuo ordinarius, Academiarum Divionensis & Rhothomagensis, Necnon Collegii Medicorum Nanceiani socius, Censor Regius & Saluberrimæ Facultatis Medicinæ Parisiensis Baccalaureus, Thescos Author. A. R. S. H. 1785, AB OCTAVA AD MERIDIEM.



Typis QUILLAU, Universitatis & Facultatis Medicinæ Typographi,
viâ dictâ de Fouarre, 1785.